

**Wujudkan Kesedaran Pulihara Warisan Alam - Sultanah Pahang
Bernama
1 April, 2012**

SHAH ALAM, 1 April (Bernama) -- Sultanah Pahang Sultanah Kalsom memuji usaha gigih Pertubuhan Pelindung Khazanah Alam Malaysia (Peka) dalam mewujudkan kesedaran di kalangan orang ramai untuk memulihara alam, meskipun usianya baru setahun jagung.

Sultanah Kalsom, yang juga penaung Peka, berkata pertubuhan itu diwujudkan Februari tahun lepas dengan misi mewujudkan kesedaran dalam pemeliharaan hutan, sungai, laut dan hidupan liar selain bergerak aktif memulihara hutan hujan Malaysia, serta berusaha ke arah penghutan semula dan kelestarian hidup.

Baginda bertitah tahun lepas Peka bertungkus-lumus bersama Orang Asli dalam kerja-kerja penghutan semula di Pahang.

Sultanah Kalsom bertitah Peka juga telah memulakan satu proses berterusan untuk menubuhkan Konservatori Warisan Hutan Hujan Diraja di setiap negeri, yang mungkin menjadi realiti dalam masa terdekat.

Titah baginda, pada Disember lepas, anggota Peka menyertai program pemuliharaan alam di Sungai Delam, Raub dan menanam lebih 2,000 anak pokok Meranti dengan bantuan 100 sukarelawan serta lebih 30 pegawai Perhutanan Pahang.

---BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=656274>